

# 護命放生軌儀法

唐三藏法師義淨譯

夫以懷生者皆愛其生上通賢智有死者咸畏其死下洎蜚蟲由是善逝隨事而修慈不損含識量內身而准物刀杖不加唯以大悲

像九

宣揚法化於護生處極致慇懃是佛弟子理應隨作觀蟲濾水是出家之要儀見危存護乃悲中之拯急既知有蟲律文令作放生器者但為西國久行人皆共解東夏先來未識故亦須委其儀若不具陳無由曉悟其器任

用銅鐵瓦木瓦即安鼻鐵木准成若擬隨身將去可用銅作唯受二升三升即是舊來小銅罐子還施銅系令穿手得過底傍一邊須安銅鈕可受小拇指頭若乞食去時穿在左臂以衣掩蓋右手携鉢乞食得已隨至一家

安置飯鉢自將淨繩一條如麤筋許隨井深淺繫罐取水濾以小羅斟酌得足即以繩一頭穿鈕急繫擡系等繫小鐵鉤鉤系起時務令平穩此並預先作了不得臨時求覓即以小羅覆蟲罐內徐徐放下至水縱鉤拔繩令覆再三下罐方牽出井此是乞食之儀也或用銅碗漆碗穿孔著系權用亦得若在寺者即以常用鐵罐覆之如前安置少有別處底傍著鐵銀可容三指以罐鉤內中擡起系等同前著鉤覆蟲在中放使至水假令深井亦得為之若別畜繩恐成勞擾若井深處或可別為盆貯或可送往河池寫水竟時還須滌器斯其法也濾羅樣式如別處言之豈容井口之上翻羅元無放生之器欲似護戒寧顧蟲亡但以如來聖教慈悲為本所制戒律罪

